

GOSPEL TANGKOU

(Gospel Herald)

Issue No. 2

Volume : XXXVII

April - May

2023



2023 KUM THUPI

“PASIAN TOH ZAWHKHAWM.” Genesis:6:9

EDITOR:

Rt. Rev. Dr. S.K MANLUN

Bishop

**PENIEL CHURCH, IMPHAL MELC
BIAHINN SUHSIET A UM PEN AHI**



EDITORIAL BOARD

Founding Editor:

Rev. M.Hauzalian
Mobile No - 9862736491
E-mail :eimithumpawl@gmail.com

Editor:

Rt.Rev. Dr. S.K. Manlun
Mobile No - +91 9612152332
E-mail :melchqtrs@gmail.com

Joint Editor:

Rev. Nengkhanlal Milun,
Director of Ministries
Mobile No- +91 6009924646

Managing Editor:

Rev. Kamminthang,
Director of Missions
Mobile No- +91 9612281530

Contributing Editor:

1. Rev. Dr. Hangminthang
Mobile No. +919612997858
2. Rev. Thangliankham
Mobile No. +9862830905
3. Rev. T. Chinlunmang
Mobile No. +91 7630854610
4. Pastor Kamneithang
Mobile No. +91 8974609177
5. Divisional Superintendent teng

Design & Setting:

Mr. Khamkhanhau
Mobile No. +918974955366
E-mail : munluohaupu@gmail.com

Circulation Manager:

1. H. Khaikhogin
Mobile No - +919862133422
2. Dongzakam
Mobile No. +919612198903

A SUNG A THU UMTE

Editorial	2
Mother's Day Message	3
Pasian toh Zawhkhawm...	6
Mihing sang in Pasian ...	11
Sawltah Paul leh Gintu	13
Pasian toh zawhkawm numei...	21
Youth with a Mission	23
Thu tuomtuom	29

Patron Member □.2000/-
Kum khat lah man:
Khut ah - □.200/-
Dah ah - □.250/-

Article zousie Editor kunga pieh ding; ahilouleh, e-mail in
melchqtrs@gmail.com leh WhatsApp tungtawn in a piehthei ding hi.
Tualeh, a lahman Circulation Manager kunga pieh ding ahi.

Editorial laikung pan

Biehinn suhsiet toh kisai in etton ding Laisiengthou aumte pansan in tamlou houlim vai.

“ Tuachi’n Babylon leengpa Nebuchadnezzar vaihawm kum sawm leh kum kuona ha ngana ni sagi ni’n Babylon leengpa veng pawla galkap lamkai Nebuchadnezzar Jerusalem ah ahing pei hi. Aman Mangpa inn meiin ahal a, leengpa inn leh Jerusalem a inn zousie, miliente inn teng zong mei in ahal a, tua leh galkap lamkaipa kunga um Babylon galkap zousie in Jerusalem kimkot a kuulbangte a suchim sieng uhi.

Tuachi’n khopi sung a um nalaite leh Babylon leengpa kung a naki pelutte, tua leh mipi um nalaite zousie, vengpawl a galkap lamkai Nebuzaradan in sal in apuimang sieng tahi. Mangpa inn a sum eng khuomte leh a tunnate, tua leh sum eng a kibawl tuikuong lienpi Babylon galkap ten asatse dildel ua, tuate Babylon gam ah apomang siengta uhi. Tua leh belte, vut luohnate, thaumei puon tetannate, tawkeute sum eng a ki bawl, siemputen azah uh um leh bel zoisie zong a lamang sieng uhi. Tualeh mei lah na kuong, maiphiet kuongte toh, sana leh dangka a kibawlte zousie Babylon galkap lamkai pan alamang sieng hi. 2Leengte 25:8-11,13

Paniel Church MELC Imphal kumpi in ang suhsiet izah ni’n mangbang ikisa chiet ua,

lungkhamna leh bangbat na’n idim chiet uhi. Imphal mun ah office ten va kidel a bangma bawlthei iki nei tuon sih hi. Khummun a ka lungsim a hing kilang ahi leh a tung a Laisiengthou ka tahlat pen hing kilang in keima leh keima kaki henem maita a hattuomte henem nan kanei hi. Tunia ithuoh pen uh malai a hattuom masa leh Isrealte thuoh toh tehkak lei bangma ahi sih hi. Kuulbangte suhsiet ahia, Siemputen vanzat teng suhsiet a aum mabang in ei Bieh Inn sung a teng zong suh siet in a um hi. Bangma lahkhet man umlou in silbangkim teng suhsiet leh suh manghtai in aum hi. Ahin unaute kingai tuo leh ihamphat na mama uhi, koima sal apui in ium sih ua en in Isreal ten tambang in a tuoh uhi “*Tuachi’n khopi sung a um nalaite leh Babylon leengpa kung a naki pelutte, tua leh mipi um nalaite*



Gospel Tangkou April - May 2023

zousie, vengpawl a galkap lamkai Nebuzaradan in sal in apuimang sieng tahi. Mangpa inn a sum eng khuomte leh a tunnate, tua leh sum eng a kibawl tuikuong lienpi Babylon galkap ten asatse dildel ua, tuate Babylon gam ah apomang siengta uhi". Manipur police ten Tribal Colony kimkot in vengtu in apang ua, koima alutsah sih uhi. Hatuom mite idamkim chiet ua, koima puimang in ium sih ua, lockup leh thongsung ah zong koima ium sih uhi. Halehluiah eite hing vengtu khu Mangpa ahi.

Lapuohtu in "Mangbat tampi ka tuohte lai ah, Genthei tah a kaum lai in. Ka ngaisut chieng kidang sengsang. Na sieng um in bang ka zau diai, Nang ei khotuo nate". Tami laa in kei ahing suhat a, lungkham leh mangbang in um nan lei Mangpa'n kei ei khawtuo hi chi ka phohkhie hi. Mangpa sieng a umte ding leh a khotuona

tangte ihua, lungkham mangbang in um lai in ei a ding a hoizaw Mangpa'n ang lemgelpi man in Mangpa min phat in umta hen. Pasion lungsietna toh MS Zoveng Game Village, Imphal ah Plot 2 ilei zouta ua Mangpa kung ah kipahtu tun vai. Nithum ni a Bieh Inn tungding zou ding chipa Jesu Khrist zal in kumthum zouchieng in Imphal Paniel Bieh Inn tungding a um ding khu iki nepna uh ahi. Mangpa muong vai Aman atate liengvai ding aphaal ding ama?

Jerusalem kuulbang tungding kiapa eipa Pasion ahi, khaile unau kipan va ui Jesrusalem kuulbang tun dinglai a, langkhat a phaw tawi a langkhat a nasem ahi mabang in ei zong ipan theina chiet a pang va iu. Ituohte leh ithuohte uh ngaituo lei, Mangpan tamte sang a hoizaw ei a ding in hing guon thamlou ding ama chi khu kaki nepna ahi zing hi.

Mother's Day Message

~ Nh. Nuamboi, Women Promoter

Nute Ni hing pan khiet dan America aum Philadelphia gam mi Anna Jarvie kum1894 in pieng a, ama khu kum 41 achin kum in anun a shisan a, a sanggam te mittaw khat tawh um in, nu poimaw dan hing thei khe tha in kum May 10 1908 ni'n Nute Ni hing puang khia hi. Kum 1914 in USA President Woodrow Wilson in parliament ah polut in kumteng in May ha Pasion ni kalnih na pen Nute Ni in hing kizang tahi.

Gospel Tangkou April - May 2023

Nu chi thumal pen lohsapna, dahna mai hilou in lungsim sung ah kipahna nopna, itna lungsim sung a um in kilou khawm zel hi. Tuaziehin, Nu chi kammal khu humpen leh ngaipen hi. Zauthong, dipkuat Chiang in Pa ei! Chi sang in Nu ei! Chi ki tam zaw hi. I nuten ahing vua le zong Nu ei chin kikap thou thou hi. I nute hing itna a let man in isileh sa a teng den ahiah zia ahi.

Khawvel a teng mihing te hi “Numei leh Pasal” in kikhen a, numei zousia zong amizia kibang kimlou hi, tuamabang in Pasal te zawng kibang kimlou hi. Pasion in numei pen pasal sang a hatlou zaw asiem hinanleh aumdan kilawmna in pasal lungsim azou hi. Pasion in numeite umdan ding dei huai tah tah apasal te uh atate, insung, hattuum leh khawtang tung a asuh lat ding uh phumguh ana um hi. Tua mizia/hindan hoite ahuntah a zangsiem tu numei khu zatat um leh enton ahing ching a Pasion leh mihingte kipahna leh tawisang in aum hi.

Numei/Nu umdan tangpi te:

Nu/Numei pen aman phat gual gual un amawpuohna uh zong tam hi.

1. Siengthouna: Tahsa leh hagau in Pasion nei numei khu siengthou hi, hoilou na leh pawlte in aum

ngaisih hi Jacob 3 : 1- 12. *Tuamabang in numei tenzawng puonsil kilawm hun leh zumthei leh umdan siem in kizem uhenlen, sam sukil ahiei, tuikepsuang ahiei leh silmantam a kizem lou in, ahivang in ginna, itna leh siengthouna leh kideh zouna toh hindan kilawm a aum uleh naupai na ah hundam in a um ding uhi.*

2. Taimat na ; Khristian numei hi mithasia a umngaisih hi, zomtho/ zulhzau tah in asem ngaisia sun leh zan in a innsung mite ading in phattuum ngaitah in nna asem jel hi. A kul leh apoimaw dungzui in innsung ah, khawtang ah tualeh hattuum ah a semzel hi. Romte 12:11-13. Kuhkal na lamah thase sih unlen, hagau lam ah phattuum ngaitah in Mangpa nnasem un, kinepna ah kipah zing unlen, gimthuohna ah thuohat unlen, thunget nalam ah hakat un. Misiengthoute tahsap awnghu ding in na nei na lamte uh kitan pi unlen zin bawldan siem un.

3. Hagau lam ah; Sakhi luituite ngai a atau bang in, ka hinna hagau in nangma ngai in atau hi. Pasion nei numei in hagau lam silte a ngaina hi. Ahun leh atheina tekhu Pasion a ding in a it ngaisih hi a, silbangkim ah Pasion amasa pen in akoi hi. Late 42: 1-2. Sakhi in luitui luang dieldiel a lunggulh bang in, aw Pasion ka hin na in nangma

ahing lunggul hi. Kahinna in Pasion angai a, Pasion hing ngai in adang ta hi, bang chih chiengin Pasion kung a tung in Amasang ah kaki lah diai ?

4. Kituhlutna; Pasion nei numei in ahina thei in, Pasion leh apasal nuai ah aki tulut hi. Apasal kipahsahna khu amawpuoh na ahi chithei in abawl zel leng hi. Sarah in apasal Abraham khu ka Mangpa achi hial hi. Thupilte 31: 10 -12. Zi umdan hoi koi in amu zou diai? A manphat na pen Rubi suang mantam sang in amanpha zaw hi. Apasal lungtang in amanu a muang chinten a, phattuumna a tasam ngai vawt sih ding hi. A manun adam sung in apasal ading in aselam hilou in ahoilam na aseppie dinghi.

5. Innsung kepdanah; Innsung a sil umte hoitah in a umnadi kilawm tah in koi a, ahun leh amun a zap zangkhai ding in ki tuptah in koi hi. Khovah masangin amanu a thou a, a innkuonte kung ah ann apia a, tualeh a nungahte a ding in tan vou a hawm pieh hi. Ama nu'n lou angai tua a tuakhu alei a grep huon abawl hi. Thahat na in a tai agah a, a bantha a hatsah a thasiat na ann ane ngaisih hi. (Thupilte 31:15-17)

6. Zinbawl dan ah; Pasion nei numei in zinbawl a siem hi, a innsung a lut leh pawtte lung muang tah leh taitah in um uhi,

amanun ainkonaite mai hilou in migenthei leh panpi ngaite panpitu in apang hi. Panpi ngaite panpi chi in silpieh maimai hilou in, hehnemtu, zilsahtu leh hasottu in lainatna toh silpieh mantam petu in apang hi. Akhut migenthei lam ah azah a, akhawtuona khut in tasamte abanpha hi. Ama nun pilna toh akam akah a, alei ah hepina dan a um hi (Thupilte 31: 20,26).

7. Lamkai tu hina ah; Pasion nei numei khu lamkai/ puita a hi. Atate ading in sangshie /oizapi masapen a hia, innsung ah anhuon danding, meh bang huan ding, innsung a innkuonpите khat a umlou lezong nu mah ki dong hi. Innsung khaikhawmtu Pate hinanle asupichingtu khu numei/nu te ahi. Innsung guah hilou in gam le nam, hattuum leh khotang azawng apoimaw pen numei/nute ma hizel, hina kembittu numei nampuan kilom tah ateng leh tawisang tu ahi uhi. Zilsahtu hihna ah *Danpiahnina* 6:7. "*Natate uh phatuamngaitah in na zilsah ding ua, na innsung a na tou Chiang bangin lampi a na pei Chiang bangin nalup Chiang bangin tuale na thaw Chiang in zawng na hil zel ding hi*"

Thupilte 31 : 25;30. Thahat na leh zatatna amanu puansil ahia, ngaiban na pen sawlhatna ahia, tuale melhoina zawng bangmalou ahi, hinanle Mangpa gindan siem numei in pahtat alaw ding hi.

Gospel Tangkou April - May 2023

Nute manphat dan tampi gending um hi. Khovel a mi minthang ten zong anute uh manphat dan ana gen chiat uhi. Tuate lah a khenkhat talang vai:

1. Naoleon “Nuhoi hing pia un, tuachin namhoi hing pe vang”
2. Abraham Lincoln Anu kepna leh ahoina zal a adin mun tung thei ahidan gen in anutung a bat ahau dan gen hi.
3. George Herbert “Nu kizen Nu hoi khat sangsia zakhat sang in phatuam zaw hi”

4. DL Moody “Leitung a Nu zousie kei nu bang hichiet uleh suangkul angai sih hi”

5. H. Benson “Leitung a galkap hangsan te sang in nu hoi khat amanpha zo hi”

6. Martin Luther “Pasal te thahatna thuguo zi hoi ahi.”

7. M.K. Gandhi “Numei khat laisiem sah khu innkuon khat laisiam sah toh kibang ahi”

Tuni’n Nute jousia Mangpa’n Nu mantam, Nu manpha hing hisah chiat ta hen.

PASIAN TOH ZAWHKHAWM

~ Pastor Khup Do Khen
Bial Pastor, Lamka Division

Tualeh Enok in Mathuselah ahin nua in, kum zathum sung Pasion toh azawhkhawm a, tanu tapate ahing hi. Tuachi’n Enok dam sung kum zathum sawnguh le nga ahi . Tualeh Enok Pasion toh a zawhkhawm a, aum, tasih hi, Pasion in alahmang tah ziehin. Siem. 5:22-24.

Tam atunga Laisiangthou bung leh tang kigiel ah khu’n Pasion tawh zawhkhawm chi kammal mun ni ah akigiel kha hi. Tambanga Pasion tawh zawhkhawm chia kigiel pa khu koi ahei ichi leh Jared tapa ENOK ahi hi. I Pu uh, mimasa Adam akipatsa akhang 7na ahita hi. Tami ENOK hunlai in jong

Ipu uh Adam zong ashi nai sih a, a dam nalai hi. Enok min khiehna khu, “Pasion kunga latdoh/ aap khieh”(dedicated) china ahi. Eden huan a Adam leh Evi khelna zieha apuasietna uh hamsethuohna (Edenic Curse) in ana nuazuizing pen atop theina dinga tambang min Jared in ana phuoh ahi hi. I Laisiangthou

sungah Enok min pua mi **ni** leh **khopi** khat aum ahi. Tuate enzual vai.

1. Kain tapa masa pen min ahi. (**Siem.4:17-18**).

2. Nod gam a Kain in atapa min pua a aphudoh khopi min ahi. (**Siem.4:17**).

3. Jared tapa ahi banah Methuselah pienna pa min jong ahi. (**Siem. 5:18-24; Luk 3:37**) Tami Methuselah pienna Pa Enok kichipa khu, kum 365 sung aleitung hinkhua aman nua in, tahsa shina chiemkha lou in Pasian in leitung apatsa in ala mang ta hi (**Siem.5:24**). I Laisiangthou sungah Pasian tawh zawh khawm midang tampi zong a um tham ua, hinanleh Pasian tawh azawhkhawm hi chi kammal ana kizahna pen leh ana kigen lawhna pen khu Enok leh Noah te ana hi uhi.

Tualeh Pasian in ana houpi jing leh ana kep zing, ginna lam a etton pen a inei uh Abraham jong khu **Pasian in azawhkhawmpite** laha khat ahi hi. Sodom leh Gomorrah khopi haltum dinga hing kuan vanmite nasan inzong Abraham kungah Pasian thuguh a imm ngam sih

ua, agen doh ta uhi (**Siem.18:17**). Pasian tawh zawhkhawm hattuomte kungah Pasian in athuguh agen nuam mama hi. Pasian in a THUGUH agen ngamna hattuom lamkai ihi uh apoimaw mama hi. Bangteng hitaleh, Pasian hilhial in zong athuguh agen ngamna mimuanhuai Abraham zong Pasian tawh a zawhkhawm hi chi thumal iLaisiangthou ah ana kigel kha moh sih hi. Ka lungtang bang pua chia ana gen minthang David tawh zong azawhkhawm chi ana kigel kha sih hi (**Nasep 13:22**). Pasian in aet zing leh ataisan ngailou mithupi khat ana hitham tham a, hinanleh Pasian in azawhkhawmpite hi chi kammal Laisiangthou ah ana tuang kha vot sih hi. Pasian in Ama mi muanhuaite khu ahoupidan, auppi dan, azawhpi dan, akep dan, atuom chiet jong ahi kha ding hi. Hinanleh Laisiangthou ah Pasian in amasang a peidingin Abram asawl hi chi thu atuan lel hi. ***Tualeh Abram kum sawmkuo leh kuo ahi in Mangpa akungah ahing kilah a, a kungah, "Kei Pasian Bangkimbawlthei ka hi , ka masaang ah pei inlen tualeh***

hoi bukim in um in” achi hi.

Siem.17:1. Leitungah Pasion mizah te zousie'n leiguolzawl na leh Hagaulam guolzawl na chituom tuom tuom ana tang chiet uhi. Tuachimabangin Abram jong guolzawl na loupitah leh simseng lou Pasion in ana pie hi (**Siam.12:2-3**). Khumi guolzawl nate zousie khu, I Mangpa Jesu Khrist zal a eiten, tukhanga itan theina dingun, Pa Pasion in ahing na lem guot sah ahi hi (**Gal.3:14**). Pasion in, Ama toh izawhkhawm theina dingin gingtute zousie kungah chance or hunlem khat chitchiet ahing bawlsah hi. Tami chance sumang loua, ana zuitheite khu ahampha uhi. Tambanga Pasion in mikhat azawhkhawmpi hunsung khu atom e, asawt e chi pen akithei bukim thei sih hi. Tambanga Pasion in a zawhkhawmpi mi tamlou tahlang zual vai. **Noah, Abraham, Hannah, Jacob, Moses, Deborah, Elizah, Elisha, Isai, Jeremiah, Mary, Paul, Lydia, Apollo, Peter** leh adang tampi jong aum uhi. Hinanleh, Laisiangthou sunga **Pasion tawh zawhkhawm** chia laiteng laimal a ana kigiel khu Enok leh Noah bou ahi hi. Amau tegel

tawh azawh khawm banga Pasion in azawhkhawmpi midang koima aum sih hi.

Khelna zieha puosietna aum masangin, Eden huan ah Pasion in Adam akhawlkhawmpi a avahkhawmpi zel hi. Vahkhawm ichi chiengin, lampei khawm, lamzui khawm, zawhkhawm china ahi hi (**Siam 2:15**). Tam mun a alamdang khat ahileh, tungman(buan) apatsa kisiem leltah mihing khu Van leh leitung bawlp a Pasion in aki khawlkhawmpi a, avahkhawmpi zel chi moh pen alamdang ma ma hi. Tami in itna Pasion ahina asulanh/akilangsah mama hi. Tami hunlai in leitungah, natna, dana, kana, hitui luanna, gilkielna, Dangtahna, shina chite ana um nai sih hi. Tam nat-leh-sat, gilkiel-dangtah, shi-leh-man kichite khu khelna zieha hing um ahi hi.

Siem. 5:22,24 na sungah Enok pen Pasion tawh azawhkhawm hi chi'n i Laisiangthou sungah ana kigiel sese hi. Zawhkhawm ichi chiengin, lampi khat a peikhawm, anunung amasa um ahi sih hi. Khat anua apei, khat amai a pei china zong ahi sih a,

Gospel Tangkou April - May 2023

khut le khut kitu kawm a, akikim a peikhawm china ahi. Tam pen ni khat, ni-ni thu, hakhat-hani thu ahi moh sih a, Kum 300 sung **Pasian tawh a zawhkhawm hi** achi tanghiel moh hi. **(tang 22)**. Eiloipi, nikhat jong siengthou zou vevaw talawm loute toh kihahkhieh vayie tei e izaw. Hun khu Pasian khut a um ahi. Pasian in nang le kei tawh azahkhawm ding hun leh ahing zawhkhawmpi na ding hun ahing bawlsah hi. Khumi hun khu theisiem sawm inlen thungen in. Hun leh nite, kum leh ha te neipa Ama ahi. Tami hun manphat dan pen Enok in athei siem mama hi. Minute khat dahkal khat mai mai jong Pasian tawh zahkhawm lou ding in pamai asa vangut hi.

Ama toh kipawl na khu vah a gamtatna ahi **(1Joh.1:5-7)**. Aziehpén Pasian khu vah ahi. Vah a umloupi a, Pasian toh ka zawhkhawm hi ichi uh pen zuou pumlum ahi hi. Tualeh vaah a um ten simleivai leh hagau vai asai kop sih uhi. I Mangpa Jesun zong leitunga ahing len lai in, simleivai leh hagau vai asai khawm sih a, ka lenggam khu tam leitung ahi sih hi ana chi hi. Pasian pen athu lou thu salou ahiziehin, Ama vahna sunga na up utsih lepen, azawhkhawm

theilou ihi mai uhi. Ama chidan dan a ium lou dinga ahi leh Ama toh izawh khawm thei mal mal sih ding hi. Ama chidan dan a um khu nang leh keia dinga silhoi leh manpha, kipah huoi pen ahi hi. Tami thugil itheisiam theina lungsim-lunggel khu Setan in ahing suhmiel sah tah ziehin, itheisiam thei tasih ua, ipom siem thei sih uhi. Pasian toh zawhkhawm khavotloupi a Khristian ikichi moh zong sil zumhuai mama thukhat ahing suoh doh tamoh hi. ***Aki lung tuoh sih uleh mi ni azawhkhawm thei ding uoi mah? (Amos 3:3)***. Tahsa a shina itunga ahing tun masangsie'n, ihattuom mipite tawh, Pasian in itunna dinga ahing guotpieh gamchiem zuon a peikhawm leh zawhkhawmte ihi uhi. Kilungtuoh taha izawhkhawm thei uleh tahsa leh hagau a khangtou ding ihi uhi. Kilung tuoh lou pum pum a lampeikhawm hattuomte ihi uleh, ihat sih ding ua, kihau kawm kawm a lampi zuikhawm mai mai ihi lel ding uhi. Lampi a kihau kawm kawm a peikhawmte khu, melmapa Setan in atunna mun ding uh atun masang un, lungkiehna buannoi ah a oh sah mangsieng dinga, gamchiem mun atung vot

Gospel Tangkou April - May 2023

sih ding uhi. Kilung tuoh loupipi a lampi peikhawm ding chipen thada huai mama hi. Peikhawm lou bang aut huai zaw ding hi. Kilungtuoh louna leh kihauna te pen eima mimal angsung khualna leh keima thu thu ichi khah chieng ua hing um ahi bou hi chi iLaisiangthou in agen hi (**Jacob 3:13-16; Phil.2:21**). Kithuneisahna ahing um khah chiengin, ilamzui khawmpi te kithalawpna teng ahing beipai a, avul nget ngut ua, thada huai asa vangut uhi. Midang tawh zawhkhawm ding bang utlou sasa in ahing lunggul tamoh uhi. Tahsa leh Hagau ah khantou le mah, ngiemkiehna leh puhsietna huaisetah ahing hizaw kha thei hi. Mipite ngui le baa a ahing um chiengun, phawngal kia pen ham sa mama hi. Tuabang ahiziehin, kithangsiet kawm kawm in lamzuikhawm sih va ui (**Jacob 3:16**). I hattuom khu imipite'n Khrist silte asuina mun uh leh Pasian kammal azahna mun uh suoh sah zaw vai. I hattuom khu awm gum, bantha zietna leh thuneina show na mun hisah da ham ham vai ui (**Phil.2:20-22**). Hattuom lutang I Mangpa Jesu Khrist ahi dan theisiam zaw va ui. Among mong azong, bangzieha isie-leh-pha theina te uh jong suhmiel a

um sieng ahi ta moh diei mah izaw !!! Buaina Pasian bie lah hisamlou hai a maw? (**Eph. 4:18; 1 Kor. 14:33**). Pasian tawh zawhkhawm utna lung sim inei ua, Ama toh izawhkhawm masangsie uh pen, abuai buai ding ihi mai uhi.

Enok in ama hun lai a gitlouna nasep miten asepchinteng uh ana langpan vevaw a, thudih nakohmu jing leh ana gen jing pa ahi hi. Pasian mitmu a kilawm lou leh mitsip huai tun tun, Pasian chouna leh engbawl-na nasep zousie azahda, langpan vevaw Pasian mimuan huai khat ahi hi. Tua ahiziehin **Juda 14,15,16,19** na mun te ah Jesu Khrist ahing kumsuh dingdan leh avaihawm dingdan khu Enok in ana genlawh ta hi. Tuhun a hattuomte din mun toh aki bang thou hi. Adam apatsa kipan a khang sagina Enok in, imailam hun a sil hing tungding leh Pasian in mihingte gamtatna zousie vaihawmkhum ding ahi dan ana tangkoupi hi. Sil hoilou leh kidah huai mama bawlte jousie in Pasian vaihawmna zauhuaitah maituoh ding uh ahidan leh akilangtanga kiphoulah ding ahidan jong ana uang gen mama hi. Enok hunlai mabangin, eite jong gitlouna leh mawna tawh kidim leitunga

teeng leh khosa ihi uhi. Leitung silten ikizawsah a, iki pumval sah ding uh ahilaijang sih hi. Pasion toh kalsuan khawm a, hinkhua jangkawm ding Pastorte, Upate, hattuom lamkaite leh Asisan a atatkhietsa a hattuom member ngen ihi uhi. Enn na, huatna, kithangsiatna, kimudana, kisiatna, kihauna, duamna, huaihamna te itaisan ding uh ahi hi (**Gal.5:19-21; Rom.1:28-32; 2Tim.3:2-5**). Pasion vaihawmna khautah leh huaisetah maituoh chiet ding ihidan, Enok in ama hunlaia mite ana hil ma banga, eite jong ahing hil ahi ta hi. Pasion vaihawmna khautah maituoh ding ihi dan uh mite kunga ihil ding uh khu gingtute mawpuohna ahi hi. (**Nasep.3:19-20; 1Thess.1:10**). Ama umna a eite jong ium theina dingin, Ama eite la dia hing kumsuh ding ahi a, khumi hunchienga Ama toh

zawhkhawm dinga kigingsa leh mansa diam a ina um chiet up ding uh ahi. (**1Thess.4:16-17**).

“**Tualeh Enok Pasion toh azawhkhawm a, aum tasih hi. Pasion inn alahmang tah ziehin**” (**Siem.5:24**). Tahsa shina chiemkha lou a, Pasion in **alah mang** chi thu pen alamding pi khat ahi hi. Pasion in alah mang, a tha, a shi sah, a hinsah chithute atam sim mama hi (**Siam.38:7**). Tami thu in agen nop khu bangma dang ahisah, Abraham hun masang leh nua ah jong, Pasion thu gingta a, muangngam te adingin, Pasion kung tuntheina ding lampi ana um zouthamta hi chi ahing theisah nopna ahi hi (**Heb.11:5; tekah in Job 19:25-26; 2 Leeng.2:10-11**). Simtute Mangpan theisiamna hing peta hen.

Amen....

Mihing sang in

PASIAN MAI EN ZAW VAI

~ Pro.Pastor Hausawmlal

Kumchiin a MELC in kumthupi ina nei jel mabang un tukum 2023 ah jong Pasion hing lemsapina toh ichi ding ah, “**Pasion toh Zakhawm**” kum thupi ding in inei kheta dupmai uhi. Awle! “Pasion to Zawkhawm” ding ihina ua eilam/mimal lang apat in isil bawl ding uh atam mamah hi, ahin silzousie thatkhat ah bawl beithe i ahi sih a, tua mabang in thakhat

Gospel Tangkou April - May 2023

a gen beithei jong ahi sihi. Ahin tunia ibawl thei masa ding uh leh igenkhawm ut uh khu “Mihing sang ah Pasion mai et zoh” ding chi khu ahi.

Bang die Pasion imai et ding uh ah ma? Pasion khu PASIAN ahi jie, sil jousie siemtuh leh bawl tuh ahi. Tualeh tambang Pasion toh zawkhawm sawm ihi mohpen uh silthupi pen zong ahi chilei ki genkhiel lou ding ahi. Tuajieh in Pasion khu amasah pen in koi in, mai et in tam leitung ikhualzin na uah ama toh ki zawkhawm lei ki lawching ding hi. Joseph Arimathai khuomi, Judate vaihawm lientah, mihausa, miditah leh Pasion gam hing tung ding ki lametzing pa ahi, Tam Joseph khu Bible/ Laisiengthou ah ahinkhuo saupi gen in um sih naleh aki genkha sunsun apat etton ding leh lahding atam mamah hi.

Tualeh igen ut ahileh a mihingpite, avaihawmpite mai etlou in Pasion ma maiet zawh ding ahi. Jesu luong cross apat alakhie ngam ding koima aum nonlou lai in, amihing hinate bei leh zongkhosalou ah Jesu luong lakhie leh thupitah a Jesu luang khu thupitah in ana vui hi, Tuathamlou Jesu mat ding leh thading ahi chie avaihawmpite a kikap khawm zing lai ua Jesu na gumngam a, avaihawmpite vaihawm dante khu na dei ngailou leh lem ana sahpi

ngailou pa ahi. Joseph in ahinate, athuneinate, vaihawm lian ahi nate amasah penpen te ah koi lou in Jesu mah akoi masah pen hi. Tuahun lai ah vaihawmlien Pilate jong hangsantah in Jesu a diing maituo ngam in mai-ngaltah a Jesu luong vah ngengam pa ahi.

Joseph in ama dinmun neukhah ding pen Jesu Khrist min in a tanngam ah, Jesu minsuang in vaihawmna lienpen toite zong a maituah ngam zing hi. Tuni ei ten leitung ah milien leh milal ichite mai ah Jospheh bang in hansangtah in Jesu igumzaw/igumngam na diing uai ma?. Dihlou khu dihlou chi'n ipang ngam zing na ding uai ma? Tualou in siempu liente, laigiel mite, upate bang in theina geguh pi in Jesu kitheimaw bawl tentun in mihing mai et in, let-leh-thupi ding khohngai zouzieh in ihinkhuo uh ijangkha zaw uai ma? chi khu ki enchientha kie ding in iki hanthon uhi.

Tuazieh in “Pasion toh Zawkhawm” ding ihina ua mihing sang in Pasion mah maiet zoh ngam photphot lei Mangpa'n ilampite uh hing honpieh zel van in, Ama toh itungna ding uh thupi tah in itung zaw diing ua, ahampa pente ihi diing uhi.

To be Continue... (Aban um nalai ding)

SAWLTAH PAUL *leh* **GINGTU MASATE GINNA**

~ *Pastor M. Thangboi Zo*
Local Pastor, ELCB

Tangtel: “*Amaute Khrist naseunte ahi uh amah? Kei zong ka hi sem hi, mimaw thugen bangin genta leng, sepgimna lam ah ka semgim zaw sem a, vuohna lam ah atuong a valin ka thuoh a, suongkul ah ka taang mun zaw a, shi zauhuoina ka tuoh mun zaw hi*” (2 Kor. 11: 23).

Thumapui: Amasan anai leh agamla aum “Gospel Tangkou” simtu zousie ka sepna mun Bengaluru khopi akipat ka jatatna sangpen toh Salam ka hing buh hi.

Tuni’n “Sawltah Paul gimthuohna leh Gingtute gimthuohna, tualeh tamte tunga galzaw dingdan” chi mawltah in kikum khawm kiadin ka hing kisah a, achingloupn leh amawlpn kahi na tungah chitlana leh genval aup leh Pasian leh simtu zousie na ngaidamna sangpen uh ka hing ngen masa hi.

Tam Bible study ibawl ding pen khu, laibu tuomtuom apat ka hing kaikhawm ahichi zong ka hing theisah masa hi. Tami study ka hing bawlana san ahileh, “I Khristian hinkhuo kalsuonna ah, lungkietna, kingaisietna leh lunggimna chite ituoh hun chienga, tunia igente tungtawn a eima-leh-eima ikisuhhat na ding uh tupna” ahi hi.

2 Korinth 11: 16-33 sungin agetnuom khu: Korinth gingtute’n

hagaulam mit a etdan leh hagaulam hinkhuo thei chienlou in, khovel etdan a sil a etkah na zieh ua sawltah Paul hanthawnnate theisiem hamsa sa un, Pasian deidan hagaulam a pichinna hinkhuo tung zoulou uhi. Sawltah Paul in alaithot masa ah tami thu genchet sawm in, Pasian pilna khu khovel mite adia mawtna ahi chin ana gen jou tahi (1Kor. 1: 18-25 sim in). Tualeh mihing tedan a thupina leh galzawna ichite Pasian tedan a mathuoi leh thulimlou ahidan hilchetna dingin, Khrist sawltah hinanleh, kingaingiem tah a khantanhoi phuonzana zieh a gimthuohna (bawlsietna), guollelna leh simmawna athuohte tah lang hi. Tami zousie Jesu Khrist galzawlana chiemtena Paul in tahsa tunga kilangte ahi (2Kor. 13: 4, Isai 53: 3-4, Mk. 9: 12, 1Kor. 4: 9-12 simbe in) chi ahi hi.

1.Sawltah Paul gimthuohna:

Tamna sawltah Paul thugen zangin Hagau Siengthou in Khrist,

Gospel Tangkou April - May 2023

ama thu leh Khrist hing shina ziehte tunga aki-apkhie (kilankhie) mite lungkhamna leh thuohnate hing talang hi. Sawltah Paul in sawltah dihloute (false apostle) toh kigente in, amaute sangin “Khrist nasem kahi zaw” kichi hi. Tamna “Khrist nasem” kichi khu, “Jesu Khrist nauzui mi 12te’n amau hina kigenna a athumal zat uh, sawltah Paul in tam thumal ama kigenna dia anazat utlou, poimaw asah ziehin tamna ahing zang hi”. Korinthte lungsim a tekahna poimawsahna lienpi um a ahiman in Paul in mimaw bang, ngawlhuoipi a kitepina thu agen hi, akichi hi.

Pasian ngaituonate Khrist lungtang leh a lim amelte toh sawltah Paul kittuoh hi. Jesu Khrist in suiguollou itna leh shina a Pasian thupina atalat bangin, sawltah Paul in a ahatlounate leh agimthuohnate akisah theipi zaw hi (Jn. 13:31, Gal. 6:14). Pasian silbawltheina thupitah a thop in um zel nanleh (Eg. Nasp. 19: 11), tuate sangin sepgimna, vuohna, suongkul-tanna, shi zauhuoina tam veipi thuoh in, guollelna leh gim-thuohna a tuate suantham kisa zaw hi (cf. Nasp. 14: 19, 16: 22, Bung 13 apat 20 sng sim sua in).

Sawltah Paul in ahinkhuo a khantanhoi zal a athuohna bangza ahiei agente lah ah, tamlou anuoi ah ensuh vai. Tuate ahileh:

i) “Sepgimna” Pasian nasepna ah sepgimna tampi athuoh kha hi (Nasp. 14: 22), tamna “Sepgimna”

kichi khu “Khosakai (luong) zen a nasepna” agenna ahi hi (1Kor. 15: 58)

ii) Mihingte lah ah khelna ziehin napi’n lungmang hi (Nasp. 17: 16).

iii) “Hitui luonna Mangpa adi’n nasem hi (2:4). Tamna “Hitui luonna” san khu,”Sawлтаhte gintat Laisiengthou tunga gintatlouna anei thuhil dihloute’n (false teaching) khantanhoi alumlet man un, alah ua siltung kisietnate vangin Kum 3 sung, sun-le-zan a hitui luong” ahidan hattuomte ahil hi (Nasp. 20: 13).

iv) “Suongkul tan ah” silhoi, sil thupi sem kichi hi, tami’n agetnuom ahileh, “tam veipi suongkul tang ahina” agetna ahi (Nasp. 16: 23-24 (Philipi a), 22: 24-29, 23: 10-18 (Jerusalem a) 23: 35, 24: 27 (Kaisaria a) leh 28: 16-31, 2Tim. 1: 8 (Rom a) hi.

v) A it mama gingtute kikhena vangin da leh amaunate, adana ziehin shi ding ngangawn a angap hi (Nasp. 20:17-38; 21: 13).

vi) Shi zauhuoina tam veipi amaitua hi (Nasp. 9: 23, 29, 14: 3-5, 17: 4-9, 19: 23-41, 21: 30-32, 23: 12-21 sim suo in).

vii) Khantanhoi pomdia aniel (anuol) “Unaute” ziehin ama lungsim ah, “ Na (pain) sa mama in, lungsim ah tawldam theilou in lungmang hi” (Rom 9: 2-3, 10:1).

viii) Khrist adia asepna ziehin bawlsietna leh gentheina thuoh hi (4: 8-12, 11: 23-29, 1Kor. 4: 11-13.

Gospel Tangkou April - May 2023

- ix) Judate lah ah vuohna khatvei thu a 40 chinglou, 5vei thuoh hi (Danp. 25: 1-3 sim in). Tami'n agetnuom ahileh, "Judate dan (law) a migilou/ adihloute khu 40vei zepthei, tua sanga tamzaw kisp thei zawlou ahina ah sawltah Paul 5vei zepna thuoh" achina ahi.
- x) Hattuum sunga khelna bawl khu, khohsahna kinei nawnlou ahiman in da hi (2:1-3;12:21' 1Kor.5:1-2,6: 8-10 sim in).
- xi) Romte'n "Sia chiengin sat" uhi (cf. Nasp. 16: 22-23, 27, 1Thess. 2: 2 sim in).
- xii) Khrist leh khantanhoi thutah anusie mite tungah, "lungmanna leh dana toh hitui tampi luongin" laigiel hi (2: 4).
- xiii) Listra khuo ah mipi'n suongin asepu ua, shita chia nusiet in aum hi (Nasp. 14: 1.a).
- xiv) Jesu Khrist toh umkhawm a khelna leh tam leitung lunggimnate apat suotat ding utna zieh in a thum hi (5: 1-4, cf. Phil. 1: 23 sim in).
- xv) Khantanhoi gen a tuipi tunga akhuolz in hun sungin atuonna tembaw 3vei asie hi. (cf. Nasp. 27: 27-44).
- xvi) Hattuumte gamtatna leh ginna a siengthou dinga Ama kipumpienate ziehin "Sil zousie ah gimthuohna/ bawlsietna thuoh hi" (7: 5, 11: 3-3 sim in).
- xvii) Lui liente akaanna ah "zauhuoina tam veipi atuoh hi".
- xviii) Hattuum zousie lunghimohna toh, nichin in gimna/ gentheina tua hi (11: 28).
- xix) Khristiante khelna lam a apuo chiengin ana lunggimpi mama hi (11: 29).
- xx) A khuol zinna hun sungin "suomhatte, zauhuoinate" atuoh hi (cf. Lk. 10: 30, Nasp. 13: 14).
- xxi) A kigensa Thuhun Tha a ginna hilou khantanhoi dang ahil mite'n tangtawn a mopaina maitua ding ahidan, genlou phamo asa hi. (Gal. 1: 6-9).
- xxii) Gentelte leh a nampi Judate lah ah, zauhuoina tam veipi amaitua hi (cf. Nasp. 14: 19, 16: 16-40, 19: 23-41, 1Kor. 15: 32 sim in).
- xxiii) Hepina akipat apielkhie mite adin, "Nau suoh natna vei" bangin ka thuoh hi, achi hi (Gal. 4: 19, 5:4).
- xxiv) Adam sungin, "Khopi sunga, gamlah ah, tuipi ah, hattuum sung leh ginglou mite lah ah zauhuoina" athuoh hi.
- xxv) Khrist leh kross agalbawl mite vangin "hitui" a luondoh hi (Phil. 3: 18).
- xxvi) Sepgimna, thatawlna leh imut theilouna tam veipi atua hi. Aziehpen Paul khu pounbu (Tent making) bawl mi ahiman in, semgin in thatawl mama ding hi (Nasp. 18: 3, 20: 34-35, 1Kor. 4: 12, 1Thess. 2: 9, 2Thess. 3: 8 sim in).
- xxvii) Ginna akipat mi apua kha ding, "lunghimohpi mama hi" (1Thess. 3: 5-8).
- xxviii) Gilkiel dangta, ann-gawlna, khosih (fever) leh

gimthuohna tam veipi athuoh hi. Paul khu ama adia kitoudel a theitawp suo hinanleh, atasap teng ama adia kichinglou mama ahiman in tamte thuoh dia gintathuoi ahi (1Kor. 4: 11, 2Kor. 11: 9, 2Tim. 4: 3 sim in).

xxviii) Dihtatna thu leh Pasion zatatna thu a veina (burden) vangin bawlsietna athuoh hi (2Tim. 3: 12).

xxix) Asia gam a gingtute'n ataisan zieh in lungkhamna a dana thuoh hi. (2Tim. 1: 15) Tualeh mailam hun a hing tungding ginna taisanna patin ginna akemching dingin lunggimna toh Timothi kungah angen hi. (1Tim. 4: 1, 6: 20, 2 Tim. 1: 14 sim in).

Atungah Sawltah Paul gimthuohna point 30 bang igenta ua, tun...

2. Bangzieh a gingtuten gimthuohna itua uh adiei?

Bangzieh a gingtute'n gimthuohna (bawlsietna) itua uh adiei? chi azieh tampi genthei ding aum dinga, nanleh tami paper ah point 7 ikikum khawm kia ding uhi. Tuate ahileh:

1) Adam leh Evi khelna zieh in gingtute'n gimthuohna (bawlsietna) kithuoh ahi. Leitung a khelna ahing lut chiengin, "Natna, dana, kilemlounate leh atawpna ah shina in mihingte hinkhuo ah hing lut hi" (Siem. 3: 16-19). Sawltah Paul in, tami thu ma zangin "Tuaziehin mi khat ziehin leitungah khelna ahing lut a, tualeh

khelna ziehin shina ahing lut a, tualeh mi zousie ana kheltah ziehin, shina in mi zousie ajelsuoh tahi" (Rom 5: 12 tomkim in hilchien vai).

Rom 5: 12 nan "Tuaziehin mi khat ziehin leitungah khelna ahing lut a, tualeh khelna ziehin shina ahing lut a, tualeh mi zousie ana kheltah ziehin, shina in mi zousie ajelsuoh tahi". Tamin agent nuom khu, Adam khelna vangin mi zousie tungah khelna hing lut hi (5: 17, 19, Siem. Bung 3, 1Kor. 15: 12-22 sim in). Khelna hinglutte khu chi 2 a khenthehi ahi,

i) Siltung 3te khu ahileh:

a) Adam sungah solna leh kisietna hing lut hi.

b) Adam tungtawn in mi zousie tungah khelna ahinglut a, tuachiengin sietna in hing zuisuh hi. Tam thu vangin mi zousie tungah khelna leh sietna kiluoh suh hi (5: 19, 1: 21, 7: 24, Siem. 6: 5, 12, 8: 21, Late 14: 1-3, Jer. 17: 9, Mk. 7: 21-22, 1Kor. 2: 14, Gal. 5: 19-21, Eph. 2: 1-3, Kol. 1: 21, 1Jn. 5: 19 sim in).

ii) Adam khelna in asuon-leh-hahte tung ah bangchi ki luohsawn ahiei chi sawltah Paul in agenchien sih hi. Mi zousie Adam khel lai hun in um a, ama khelna sungah aum china thu ahi zongin, Adam khelna in mi zousie tunga tung chi thu ahi zongin Paul in genlou hi. Adam khu a suon-le-hahte dia lutang (Head) ahiman in ama khelna pen amaute

Gospel Tangkou April - May 2023

tengah tung hi, chiin Paul in genlou hi. Mi zousie in Pasian masang ah amau khelna vangin, “mi zousie akhiel uhi” chi ahiman in mi zousie tengah khelna hing lut hi. Laisiengthou gen bangin, “mi zousie sietna in luo dim in, khel nuomna leh siet nuomna lungsim nei uh” (6: 1) achi hi.

iii) Khelna vangin shina leitung ah ahing lut a, mi zousie in shina thuoh ding uh, bang zieh in? ichileh, “mi zousie ana kheltah ziehi un” (5: 12, 14, cf. 3: 23, Siem. 2: 17, 3: 19 sim in).

2) Gingtu mi khenkhat khu amaute gamtatna thaman vangin ginglou mite toh akibang in bawlsietna thuoh uhi. Ki sum loupin khelna sui lei kibungbu tun ding ihi. I tua bangbang, imu bangbang neh paipai lei, i damtheinasuhkhah ding hi. Pasian in tambang gimthuohnate zangin eite tengah gana, khamna, thuhilna hing pieh un, tua zou chiengin akhonung ah nopsahna, dihna ga (fruit) imu hi. “Thununna khat poupou pen aki thuoh laitahin kipah huoi in alang sih a, hasiet huoi in alang zaw hi, ahivangin anua chiengin, tuabang thununna nuoi a kituhlutte dingin, ga lungmuon huoi, dihtatna asuo zel hi” (Heb. 12: 11 (1-11 sim in)). Tua ahiman in Pasian kepbitna toh hing kigamla sah thei silte pelin, pilvang tah in Pasian thu toh kituoh tah a hin ding ahi hi.

3) Gingtute’n zong, khelna leh sietna (mohna) toh kidim tam leitung a hing akihi nalai ziehin, ilungsim sungah gentheina i thuoh hi. Khelna in iziet ivei (kimvel) ahing sukhah a, hoilouna in mihing hinkhuo tampi athunun khum chiengin, lunggimna, lungtang na (pain) saiin ium hi. (Ezek. 9: 4, Nasp. 17: 16, 2Pet. 2: 8 sim in). Tua ahiman in Pasian in khelna thuneina tengah galzawna ahing kilatsahna dingin i thum ding uh ahi hi.

4) Gingtute dawi nasepna vanga zong gimgthuohna i thuoh thei hi. Azieh ahileh:

a) Setan khu, “leitung vaihawmpa (2 Kor. 4: 4-pasien) ahia, tam gitlouna thuneipa zong ahi hi (1Jn. 5: 19, Gal.1: 4, Heb. 2: 14 sim in). Eite hing suhbuoi theina dingin vangletna ama kipieh hi” (1Pet. 5: 8-9). sawltah Paul zong a tahsa tunga Ling khu “Setan sawltah ahi hi” (2Kor. 12: 7) achi hi.

b) Setan leh alawite (dawi-le-kau (evil spirit) gingtute bawlse nuom uhi. Mangpa Jesu it a, Ama thuhun thutah, thudih azui mite’n ginna ziehin gimgthuohna (bawlsietna) thuoh ding uhi. Tambang a thutah, thudih vanga gimgthuohna ithuohte’n Jesu Khrist i itna leh Ama tunga i kipialut zawna ahing suhlang hi (Mt. 5: 10, 1Pet. 4: 12 sim in). Gingtute’n thutah toh thukhen ding pa Pasian tunga muonna toh dettah a idinkip ding

Gospel Tangkou April - May 2023

uh ahi hi (Mt. 5: 10-11, 1Kor. 15: 58, 1Pet. 2: 23 sim in).

5) Gingtute'n gimthuohna ithuohna zieh khat ahileh, "Khrist lungsim bang inei man uh ahi hi" (1Kor. 2: 16). Khrist sunga um, Ama toh pumkhat suohna in khristian hina ahimbang in, eite'n Ama gimthuohna zong i thuohpi uhi (1Pet. 2: 2).

6) I hinkhuo a gimthuohna ithuohnte khu Pasion in hagaulam a ikhantouna dingin hing bawlsah thei hi.

a) A lampiel mite a khelna uapat kisia a, amaute ginna tha suohsah kia a, Pasion amuon-theina dingun gimthuohna zangin Pasion in amaute hankie thei zel hi (Vaihawmte laibu sim in). tua ahiman in, eite'n ibawl leh ithei khelnate Mangpa kungah phuongkhe di'n thum vai, Hagau Siengthou a suh lungkham thei sil aum ei chi ihinkhuo ikivel chien ding ahi hi.

b) Ama tunga ithutah leh tahlou ahing velchetna dingin Pasion in gimthuohna zangin iginna hing ze et thei hi. Setan in Job abawl bangbang in (Job 1: 6-12, 2: 1-6 sim in). Job in, Mangpa Pasion adia hin ding moh, ahilou leh Pasion amaitang a hamsiet zaw ding chi Pasion in Job ginna a za et ahi hi. Job in zong, gingloute gimthuohna athuoh u'khu, "na ginna ahing za etna ahi" (Job 1: 3) achi hi. Tamte ziehin i ginna hing piching zaw hi (Danp. 8: 3, 1Pet. 1: 7 sim in).

c) Pasion in igimthuohna khu ihatsemna ding bou ah zang louin, thumanna leh Khristian hinkhuo a i khantouna dia ahing panpitu hi dingin zong azang thei hi. Eite'n gimthuoh pat a lungnem (lungduoina) tah a thuoh zawnate iziltou thei na dingin Pasion in hing dei hi, chi thu khu Sawltah Paul leh Jakob ten hing genchien mama uhi (Rom 5: 3-5, Jak. 1: 3 sim in). Gimthuohna ichi khu eima kimuonna abei a Pasion leh ahiepina tunga ikingah zaw theina ding ahi hi (Rom 5: 3, 2Kor. 12: 5 sim in).

d) Gimthuohna a thuoh kha ten midangte tha ipieh a, ihenem theina dingin Pasion in gingtute tungah zong hamsatna leh gimthuohna hing tungsah thei hi (2 Kor. 1: 4), tua ahiman in, tamte'n Pasion nasep silte ah hing khanglou sah leh hing lawching sah hi (2Kor. 4: 7-12). Tua ahiman in, eiten gimthuohna leh hamsatna ituate tungtawn in midangte henem in thah ipieh theina ding ahi hi.

7) Atawpna ah, mi thudih, mi thutah te gimthuohna (kibawlsietna) khu Pasion in Ama gam keletna ding leh hundamna amu kibelap na dingin zang thei hi. Gentenan: Joseph a sanggamte leh Egypt mite akipat thudihlou pi'n a thuohnate khu Pasion lemgelna (God's plan) ahi hi. Joshep in, "Tualeh, leitunga nahah nasuonte uh hing kepbit pieh dingi leh hutkhietna thupitah ana a na hinna uh hundam dinga Pasion in na

masang ua kei ahing sawl masa ahi” (Siem. 45: 7) achi hi. Tam thu toh kizawiton in, athupi pen tu hun a Jesu Khrist thuohn gimthuohnate akimu thei a, gimthuohna, bawlsietna leh shina thuohna toh Pasion lemgelsa hutkhietna atangtun sahpa khu “Misiengthoupa leh dihtatpa” (Nasp. 3: 14) ahi hi. Khelna nei migiloute khut sungah gimthuohnate khu Pasion in Ama lemgel nate atangtun na ding leh Ama minthanna dingin azat thei vangin, ama khailum migiloute khelna khu ngaidam tuonlou ding hi (Nasp. 2: 23).

3. Tam gimthuohna tung apat galzawna:

Sawltah Paul leh gingtute gimthuohna thute mawltah in igenta ua, tun tamna igente tunga igalzawna dingin bang chi panla ding ahiei chi anuoi ah point 8 genin ikhupsit ta ding hi. I panla ding dante ahileh:

i) Mihingte gimthuohna zieh tuomtuomte ngaitua inlan, nang tung ah tua azieh tuomtuomte hing bangchi up chi theikhiet sawm in. Tua zieh tuomtuomte na theizaw chiengin na tuakha (experience) thute toh midangte panpi in.

ii) Na tuakha thute hamsa mama zong leh Pasion in nang hing panpi mama ahi chi theizing in (Rom 8: 36, 2Kor. 1: 8-10, Jak. 5: 11, 1Pet. 5: 7 sim in). Gimthuohna leh hamsatnate vangin Pasion itna leh Mangpa leh Hundampa ahinate nuolin dou vawt sih!

iii) Pasion muong in, thumna toh Pasion maipha suiin, Ama hing hundamna namu masie Ama ngah in (Late 27: 8-14, 40: 1-3, 130 sim in).

iv) Pasion hutdamna namu mateng gimthuohna na maitua zou na dingin Pasion hepina lam-en zing in (1Kor. 10: 13, 2Kor. 12: 7-10). “Eite hing itpa vangin tam silte tunga guolzou/ galzou pente ihi hi” chi Laisiengthou thugen thei zing in (Rom 8: 37, Jn. 16: 22 sim in). Khristiante ginna ichi khu, “gimthuohna leh thanemnate zangin Ama septhei silte akimu chienna hisah zaw hi” (2 Kor. 4:7).

v) Pasion thutah (Bible) sim in, adieh kholin hepina hing pieh Psalm laibu sim in (Late 11, 16, 23, 27, 40, 46, 61, 91, 125, 138 sim suoin).

vi) Na thuoh bawlsietna leh gimthuohnate apatin Pasion in bang hing musah (zilsah) nuom, bang hing theisah nuom ahiei chi namu theina dingin thum in, Liaisnegthou na sim ban ah, Hagau Siengthou mapuina leh ginna a pichingsa gingtute apat kihilnate sui in.

vii) Tahsa pumpi natna vangin gimthuohna na thuoh leh, damna namu na dingin Pasion damsahna thumna toh na sui chiengin, bangte poimaw ahiei? i chileh:

a) Midangte leh Pasion toh na kizawpna ah adih lungsim neiin (Mt. 6:33; 1Kor. 11:27-30; Jak. 5:16; Jn. 15:7)

Gospel Tangkou April - May 2023

b) Na hinkhuo a Jesu Khrist umpina lunggul in. Bangzieh in ichileh, “na poimaw ginna hing pe dingpa khu Ama ahi hi” (Rom 12: 3, 1Kor. 12: 9, Phil. 2: 13 leh Kil. 17: 20 sunga Ginna kigente sim suo in).

c) Pasion thutah (Bible) toh na hinkhuo kitua sah in (Jn. 15: 7, Rom 10: 17).

d) Na natna akipat na dampei sih leh Pasion a dettah in um nalai phot in (Jn. 15: 1-7), Pasion deidan bangtah a kikhelna namu theina dingin, nang leh nang na hinkhuo kivel chien in.

e) Na damna dingin Hattuom Upaten, na lutung a sathau nu ahing thumsah na dingin han in, tuaban ah na lawite leh na innsung mite zong athum din chiel in (Jak. 5: 14-16).

f) Sil lamdang atunding kinem inlen, Khrist vangletna muong in (Mt. 7: 8, 19: 26).

g) Tunia na damlouna akipat na hing damleh kipah in, tu hun, tulaitah a zong damna namu nailou leh zong kipah veve phot in (Phil. 4: 4, 11-13).

h) Na thumna Pasionj in ang dawn painai sih lezong, hing kinaw lou, ang nuol hituon lou ahi, chi theiin. Khat veivei Pasion in ahoizaw nang adding athei a, Ama minthanna a thupizaw atunna ding (cf. Jn. 9: 3, 11: 4, 14-15, 2Kor. 12: 7-10) leh eite a dingin ahoizaw atunna ding hizaw thei hi (Rom 8: 28).

i) Mangpa kunga kipum ap (full submission) gingu Khristian khat nahi nah leh Pasion in hing nusie (taisan) ngailou ding, hing manghil ngailou ding chi thei zing in. Pasion in hing it mama ahiman in Ama khut kuo muonhuoi sungah namin hing giellut zou tahi (Isai 49: 15-16).

j) Zatui (medicine) zong zatsiem ding ahi dan Laisiengthou in ahing theisah hi (Mt. 9: 12, Lk. 10: 34, Kol. 4: 14 sim in).

viii) Gingtuten gimthuohna ituoh chiengin, Khrist hing thuchiemna ahi. “Keima a hamuonna na nei theina dingun, tam thute na kung ua aka gen ahi. Leitung ah gim gentheina na thuoh ding uhi; hinanleh kipah thanuom in um un, Ken Leitung ka zou tahi” (Jn. 16: 33) achipen manghil vawtlou ding ahi. “Tualeh Pasion in amit ua pat hitui zousie anul siengpieh ding hi; tualeh shina a umnawn sih dinga, lunggimna leh kaana leh natna zong a umnawn sih ding hi; aziehpén sil masate, zousie abei tahi” chi Pasion thu ahing tangtun ni ding eite’n lam-etna toh ingah zing ding hi (Kil. 21:4).

Akhupsitna:

Sawltah Paul hinkhuo, Pasion zal a gimthuohna athuohte leh gingu masate gimthuohna, gentheina ana thuohte ua kipat in, tunia tam Bible study simtu gingu gimthuohna, bawlsietna leh gentheina thuohte, lungkham mangbang tah a hinkhuo zangte

adin, “sawltah Paul Pasion khu Nang Pasion zong ahi. Sawltah Paul aumpi bangin Pasion in nang zong hing taisan ngailou ahidan theithah lechin ka nuom mama hi”.

Hebru laibu gieltu’n, “Thuhunna na thuohlou nahi leh zawlta, na hi ua, Ta tahtah na hisih uhi, ta tahtah poumain thununna athuoh hi” (Heb. 12: 8) achi bangin gingtu dihtah khu Job banga aginna adet zing nadin, “Setan leh gingloute apat gimthuohna, bawlsietna” atuo thei mawng uh ahi hi.

Na pien masang (na Nu gil a) apat hing theipa Pasion in, tunia na gentheina, na liengvaina athei zing a, tamte gaal a tawldamna lampi ah hing pui nuom ahiman in, thumna toh, Laisiengthou toh pangin a thuoh muolsuo jou ngei din Pasion kungah ngen in. aman hun achi hunhun in tami gal (war) pal galkai din hing pui ngei ding hi.

Hamsatna, lungkhamna leh beidonna akipat tami Bible study simtu zousie Mangpa Pasion in hing pui gaalkai chiet taken, chi ka thumna ahi hi.

PASIAN TOH ZAWHKHAWM NUMEI

~ Nu Lunsuanchiin
LDC/MELC

Amasa in simtu it tahte zousie chibai!

Leitung buoina kawm kal a eite ihoina um lou hinapi tunichiengtan a damna leh bitna toh hing pui ibieh Pasion min phat in umta hen.

Tunia ihoulim nading thupi ahileh “ Pasion toh zawhkhawm Numei chiva ui. “Nang toh izawh ding leh ka kuon dinga, hinanleh nang zawpi sih ding leh kang kuonsih ding hi, “(Vaihawmte 4:8). Tam kamteng/thuteng khu koi in koi kunga aget ahiei ichileh, Pu Barak in Lappidoth jinu Deborah kungah achi ahi. Debora khu Numei ahia mi zi khat ahia, Barak khu pasal galhang tah ahia, ahileh, bang dinga pasalpha galhat tah khat in numei khat kunga nang toh kizawh sih leh galsat in kuonsih vang achi thei valong ade aw chi bang ngaituo tham ching tah ahi.

Ajieh pen pasalte khu numei sang a ahat-ahat guoh uh hi lou in gang zong a gang ua, gum zong gum ua azataat huoi uhi.

Tuhun a numei kikoi dan bangma hilou, Thuhunlui lai a numeite kikoi dan pen “Numei leh Naupang simlou or Numei leh ui” chideu dan a anaki gen hunlai peh in galhang tah pasal (warm body) Barak in Debora kungah nang toh izawhkhawm sih leh galsat in galphuol (battle field) ah kava kuon sih ding hi achita mawh hi. Bangjieh a tami achi thei atadie ichileh Pasion in guolnei/jawlnei

Gospel Tangkou April - May 2023

ana koi a, Numeite ki thusim lou hunlaitah in zong, Nu Debora ngel khu jawlnei leh thukhentu in ana zang ta hi. Mangpa minphat in umhen.

Pasian in adanglai mi Jawlnei a akoite khu siempu hina, Leeng hina leh thukhentu/vaihawmtu leh thuma vang gentheina leh thumavang mulawh theina toh apie hi. Tuachi'n Amanu (Debora) khu tam Pasian silpieh (talent/title) tetoh Ephraim singtang gam a Ramah leh Bethel kikaal a tumsing nuoi ah atou jel a, Israel tate ama kungah vaihawm pieh ding leh thukhen pieh ding in ava haw toujel uhi.

Barak toh Debora kihouna sunzom kia vai: zawlnei Debora in Pasian kunga apat thu asan dungzui in, "Barak ahoupie a, Naphtali tate leh Jebulun tate mi galsat ding pasal tulsawm lakhawm inlen Tabor muol ah va kuon tou in, galzawna natang ding hi ", achia ahoupie lai in, Barak in bangma Pasian a pat mulawhna neilou ahiman in kimuongla mama mai ahi ding a, azieh pen aman, Debora kungah, "Nang toh izawh ding leh ka kuon ding a, hinanleh nang toh ka jawhsih ding leh kang kuon sih ding hi " achita hi. Tami Contact chet ah, pasal ginna sang in numei ginna ahat jaw tham chi akilang hi. Tuachi'n Deborah in adawng a, "Awle, ka hing zawpi ding hi, ahivang in nava kuonna ah galzawna min pha nalawsih ding

hi, aziehpén Mangpa'n numei khutah apeta hi, achisanta hi.

Tuachi'n Deborah a dingdoh a Barak leh agalsatpi ding Naphtali tate leh Jebulun tate pasal tulsawm toh Tabor muol ah akuontou ua, tuana pat akumsuh lai un, Deborah in tambang in, Barak ahantoh hi, " Khaile ! Mangpa'n tuni'n nagal kidoupi ding Sisera leh agalsat hangsante nakhut sungah ahing piehni ahi, Mangpa na masangah apei sih ahiei mah?" chi'n tha apeta hi.

Tuachi'n Barak zong agalkap hon tulsawmte toh Tamor muol apat akumsuh ua Kishion lui tandong in agalpa Jabin galkap lamkai Sisera leh a galkap honte khu namsau toh vat thang sieng in anuoi mang suh ua, tuachi'n athat gamsiengta uhi.

Tamna imuthei uh ahileh, Pasian toh zawh khawm numei hangsan khat (a brave women) lamkaina tungtawn ah Barak galpa general pa leh a galkap ten tha anga ua, thahat tah a mailam nawt touzel in, shi leh hin kikal ah galzawna loupitah a tangta uhi.

Tam Article sut tungtawn a imu thei ahileh, bang hun bang hun hitaleh, nidang lai hi'n tuhun hile zong galdou ding a um zing a, dougal lien-dougal neu, tahsa gal leh hagau gal, inn sung leh khilai nasan ah zong ithei leh itheilou kal in a ahing um thei jel jel hi. Tuajieh in, galdou a ipanlah dan pen atuom

tuom chiet ahimai thei hi. Silkhat (Hope where there is no hope)
a buoina nasatah kituoh khah hun kinepna um nonlou hun a zong
chieng in, Pasian toh zawhkhawm kinepna um sahtu/kinepna or
numei khat a ding in lungkham kinepna petheitu nu.
mangbat tawpkhoh hun a zong

“YOUTH WITH A MISSION”

~ Pro Pastor John Jamlianlal

Khanglai ichi chiang atangpi in kum 18-40 kikal hunsung a umkha te khu khanglai te akichi deu hi. Khanglai hunsung khu thahatlai, mani kisuang hun, mieng hun, silzousia bolthei dinga kigingtat hun, thua hat hun leh adang dang tea hi. Khanglai hun I thangap lamlam mualsua zou hun ahia, mihing a dinga hum hampaha hun leh kum ahi. Mangkang ten ‘Golden age’ ana chi hial uhi. Tuaban ah khanglai te khu muzousian i.e, Nu leh Pate, Hattuum te, Politician te, company-private firm te, government leh adang dang ten jong zat ut pen uleh mi mit tun na pen te khu khanglai te ahi. Thamlou in Pasian in jong ami zat ut te leh leh a Hagau (Holy Spirit) apia ut te khu khanglai te ana hi kia zel hi (Joel 2:28).

Khanglai te khu Pasian lim leh mel sun a siam ahi. (Youth are Created in the Image of God)

Khanglai te khu Pasian in azat siampi te ahi. (Youth are Ministers of God) Priesthood of all believers in Khanglai te jong ahuap kha hi. Khanglai te khu Pasian betu (worshipper) gua hilou in Pasian mizat (Priest) te hi veve uhi.

“The Priesthood means: We stand before God, pray for others, intercede with and sacrifice ourselves to God and proclaim the Word to one another.” (Martin Luther)

Laisiangthou (Bible) a Pasian in ami zat te lah ah Khanglai mi bang zat ahiai khat jong ahum hi. E.g. Joshua, David, Daniel & Co, Joseph etc.

Tuama bang in Pasian in ei Khanglai te jong ahing jang ut ahi.

Khanglai um zia, tahsa (Physical), Khotang hindan (social/society), lungsim ngaituana (development of thoughts), leh adang dang te tami na i huap zou sah da sese ta mei ding uhi.

Khanglai te Ahoilou lam a kimu dan te (Negative Image of Youth)

Gospel Tangkou April - May 2023

Sep leh bol ding neilou
(Unemployment)

Khamthei a kibual (Drug
Addiction)

Mani ut na umlou a Zi/Pasal
ki nei sah (Force marriages)

Laisiam na lam a chitna neilou
(Falling standards of education)

Mopuana tahtah neilou
(Absence of initiatives)

Khovel changkang dan
dungjui a hing ut (Pressure for
modern styles of life)

Mani dei bang a lungsim
ngaitua theilou (Absence of
independent thinking related to
one's own life)

Tangkhat hinkhua (Isolation)

Siamsinna toh kisai a tahsa
kipolna umlou zia a silhoilou tung
(Consequences of absence of
education on sex)

Zi leh Pasal a kinei masang a
kiten na umzia kihil masat na
umlou (Absence of marriage
counseling and guidance)

Sunday school kai peilou, akai
khalou (Drop-out in Sunday
Scholl)

Tam a tunga point ki gen zou
sia khu khanglai te hoina pi a hing
hoilou sah tea hi a, tuazieh in
Pasian lim leh mel sun a siam,
siampi (priest) te in tua te suhhoi
leh suhdih khu imo puana 'mission'
ahi pei ngal ahi.

Mission

'Mission' khu Biblical
terminology chet ahi sih a, secular
terminology apat kilason ahi.
Mission aki chi chiang in soltu
(sender) khat um a, tua soltu pa/nu
in sep leh bol ding, tup leh ngim
anei te khu midang te tuami na sem/
bol ding a sol ahi uhi. Tuami in ama
uh nasem hilou in asoltu pa/nu na
sem china ahi.

CALLING----SENDING---- MISSION

Mission ah mi chi ni (2) aum
hi. (Two types of people in
mission)

Centripital (People coming
in) 2. Centrifugal (People coming
out)

Mission khat pou pou in tup
leh ngim anei hi. Tup leh ngim bei
in Mission aum thei sih hi.
Christian masaten (Early church)
'Mission' khu ama uh mimal a dan
in angai sut ua, (Missio Ekklesia)
hinanleh, 'Mission' khu Pasian a
ana hi jo hi (Missio Dei). Hattaum
khu Pasian vanzat, ama Pasian
"Mission" na sem ding te khu
hattuam te ana hi jo hi. Hattuam in
mission anei hilou in, hattuam te
khu Pasian Mission a ding a
hattuam te hi zo hi. Tami hattuam
sung ah Khanglai te khu vanzat
thupi pen ihi na ah ei ten Pasian
Mission ah pan bang chin pan ila
in I pang thei diai chi en khom vai.

Gospel Tangkou April - May 2023

Mission ei gingtu Christian kichi ten iet dan uleh thei dan ahileh khantanhui (gospel) mun chin a phuangzaa, sakhua dang (others faith) te khu Christian sua sah a Pasion biah inn tung ding khu ahi.

Khanglai Mission toh (Youth with a Mission)

I thupi “Youth with a Mission” chi ahi man in ithupi tungton in Khanglai te khu Mission toh um khom gige china ahia, tuamin khanglai te khu tup leh ngim nei a um gige china in jong ala thei hi. Khanglai te mission toh um khom gige ihi na ah amo um thei, hun mo a sum beibei chi te ahi lou leh thasia hinkhua neithe ihi sih chi na jong ahi.

Mission khu Pasion a ahi ichi ta ma bang in I thupi in khanglai te mission toh um khom gige iha na in Khanglai te khu Pasion toh um khom gige china na ahi. Ahin lah eite Pasion toh I um khom gige na uh ama chi ei leh ei dohna ium na mun chiat a ki ngai tua lei hoi ding in gin tat ahuai hi. Mission aki chi Chiang in bol lou thei lou sil ahia, ibol lou a ahileh ei tung a sil hoilou (consequences) tung thei ahi zia in mission khu nel sia thei mei ana hilou dan ahi. Tuaziain mission khu bol lou thei lou, ei thasiat zia leh ngap lou zia a bol lou thei mei ana hi lou dan ahi. Khanglai te khu Pasion lim leh mel sun a siam ihi

na ah ei ma mimal mama ah Pasion aum hi chi thei gige a Mission neitu pa lunglut na leh silbol te a pang teitei khu imo puana ahi ta hi. Azia pen eite Pasion khu Missionary Pasion (God of Missionary/mission) ki chi ahi.

Khanglai ten mission khu hoi a bol pat a bang chi bol ding adiai chi ithupi tungton in eikhom vai. Mission khu eima ma kunga um ahita man in mission khu eima mimal a ahing kipat ngai phot ding dan ahi. Ei ma leh ei ma iki zo/soi jou lou a ahileh mission bol ding dan in umzia anei sih hi. Mission khu Pasion a hing kipan tuajou Chiang in ei a hing ki pan tuajou Chiang in aban ban in apei thei pan hi.

Mission I innsung ah (Mission in a Family)

Mission a poimo mama ahileh I innsung chiat Pasion dei bang a innsung ki vai hom ahi.

Khanglai/Ta leh nauten Nu leh Pa zaa dan siam ding.

U leh nao, pianpi sanggam te it leh lungsiat ding.

Inn sung ki vaipuo na ah hun zat dih ding.

“No matter what you have done for yourself or for humanity, if you cannot look back on having given love and attention to your family, what have you really accomplished? *(Author unknown)*”

Mission Hattuum ah (Mission in our Church)

Hattuum khat pou pou a lamkai te khu tangton a lamkai a pang thei lou ahi. Aziapen mihing khu ahing den ding um lou ahi zia in. Tua kipat in kum 10-20 jou Chiang in tua lamkai te um ding in gin tat umlou hi. Tuazieh in Khanglai ten tu leh tu a kipat I hattuum ua lamkai dan kisin ahi lou leh mission a ding in panmun lian tah nei ihi. Kum bangzat ahiai zou Chiang in tua khangthi te khu hattuum lamkai ding te ihi uhi. Tuazia in Hattuum (Church) in khanglai te khu tuhun a hattuum hi ding in tulmo hi. Itheisa chait ma bang in khanglai hatna khu hattuum hat ahi lou leh hattuum khangtouna aki chi hi. Khen khat khat a hichin na ki gen zel hi: Khanglai te khu zingchiang a lamkai ding te ahi uhi. Hinanleh tunia ithei ding a poimo khu Khanglai te khu tuhun leh tuni mama a lamkai te ihi uhi. Aziapen zingchiang in bang hing tun ding ahiai chi koiman thei lou hi. Khovel khangtouna dungzui a khovel silte thei siam khu khanglai te ahi giap hi. Khovel khangtouna (Technology) lam a milui ten tua khangthi te ban pha non lou ahi man un khangte ten mission/Pasian na sep na khu khovel khangtouna dungzui a bol thei, sem thei ihi. Atangpi a khanglai te hattuum a Pasian na asep thei te uh ahi leh:

Sunday School teacher, Khanglai lamkai, lamkai te thumang, hattuum dan tah a um leh gamtang, mite enton thei etc.

Hattuum in khanglai apoimo a, tuama bangin khanglai in jong hattuum a poimo hi.

Hattuum mijousia in khanglai te a kipat in kinep na lianpi anei hi.

Five Important Roles in Youth Missions

Consumer: (A person who uses goods or services) ——— one who looks for and uses lessons, activities, events and social action.

Creator: one who creates, shares improves the lessons and leads or fuels discussions.

Connector: (Something that connects things together) ——— One who helps other to understand and get connected to others and activities.

Carrier: (A person or firm in the business of transporting people or goods or messages) ——— One who takes the group way of life to other groups through various forms of communication.

Caretaker: (A custodian who is hired to take care of something) ——— one who cares for the needs of the group.

“Local Churches are to be thought of not as churches of individuals but, primarily, *churches of families.*” (Paul Helm).

Gospel Tangkou April - May 2023

“A person who says he believes in God but never goes to church is like one who says he believes in education but never goes to school.” (*Franklin Clark Fry*)

“There are no little churches; all churches are the same size in God’s sight.” (*A. W. Tozer*)

Pasian nasep na ah aneo zo leh alian zo chi tuam ding aum sih hi.

Mission khu Miginum ihi ding (Becoming a Faithful man)

Eite Pasian khu ginum Pasian ahia, ei ama na sem te jong khu ginum a ngai hi.

Mission khu Tahsa leh Hagau a kisu siangthou zing (Maintaining Moral purity)

Tahsa leh Hagau a siangthou lou in Pasian na aki sem thei sih hi.

Mission khu Pilna leh Siamna ensahtu (Demonstrating Wisdom)

Pilna leh siamna bulpi khu Pasian ahia, ama na sep na ah Pasian a hing kipan siamna leh pilna toh zep ding.

Mission khu Pasian Thutah ahina suhoitu (Making God’s Truth Attractive)

Pasian khu Hagau leh thutah ahia, ana sem ten hagau leh thutah a sep ding uh ahi.

Mission khu Inei leh gou te midang te kung a hom (Sharing our resources)

Leitung khu Pasian siam ahia, mihing te jong ama siam ahi zia in nei lam inei te khu anei joulou te kung a hom a panpi ding ahi.

Mission khu mani kichapou sahna khupkhel ding ahi (Overcoming Self-Centeredness)

Mani kidei khop na in Pasian na sep na adal tu in apang hi. Azia pen mani ki dei khop ten itna (love) ata sam uhi. Pasian khu itna ahi ngal a.

Mission khu midang te ahidi bang a bol ding ahi (Treating Others Fairly)

Pasian in mijousia ama lim leh mel suun a asiam ahia, mi teng teng a it dan aki bang a, khentuam, deisahtuam anei sih hi. Tua ahi zia in midang te khu ahi di bangbang a bol ding, thet tuam nei lou ding, dei sah tuam nei lou ding ahi.

Mission khu Lemna leh Muanna boltu ding ahi (Being a Peace Maker)

Eite Pasian khu lemna Pasian ahia, ei ama na sem ten jong lem na leh muanna I bol ding uh ahi. I Mangpa Jesu ngel khu ‘Lemna leng Tapa akichi hi’ (Prince of Peace).

Mission khu Lungsintang jousia toh Pasian itna ahi ding (Loving God Wholeheartedly)

Pasian in asiam sa mite khu a lunsim/tang jousia toh ahing it hi. Mikhial, migilou mangthang ding te khu ahing it man in ata pa tnag nei sun mihing te tan ding in ang sol hi. Tuazia in ei ten jong lungsim/tang jousia toh Pasian it ding, tua in Pasian toh ki nai sem na ahing tun hi.

Mission khu Hinkho siangthou ding ahi (Living a Holy life)

Eite Pasian khu a siangthou Pasian ahia, eite ama bang a hinkho siangthou a hing ding a hing chial/han pa ahi. 'Keima ka siangthou bang in noute jong hing siangthou ta un' (Lev. 11:44)

Jesus' Model of Missions

Mission bol na ding ah Jesu Krist lei a alen lai a na sep dan thei leh poimo mama hi. Jesu leitung a ahing len lai khu Rome kumpi vaihom na nuai ahia, tuanah Rome kumpi in mite asu gen thei mama uhi. Tuabanah Jew mite mama sung a jong kidaidan lian tah aum hi. Tami kidaidan na khen khat te ahileh ajong leh ahau, natna neite adia in pha (leprosy), mitto, kengbai etc (Physically challenged) te khu pampai in aum dia uhi. Tambang natna nei te khu khelna zia ahi chi ngaisutna auma, tuajia in tambang mite khu mikhial, khotang hinkhua a kihal ding a jong

ki deilou (despised) mite ahi uhi. Hinanleh, Jesu tambang mite ait a, asudam a, aman khotang hinkhua ah apuilut kia hi. Gingu Christian ihi na ah anua ijui pa uh bangma a ei khanglai ten jong Pasian na isep ding ukhu akipha mo hi. Itenna, igam sung ah mijong, taga genthei ahilou leh natna tuamtuam vei ium tham hi. Igam peipi dan in tambang natna hoilou nei mite khu eiten jong ithet bol un aki lang hi. Jesun ama hunlai a natna hoilou nei a umte, khopi pam lam a umte asuh dam leh society a apuilut kia bang in eiten jong tambang mite khu tuam bol lou a, amau te damna ding leh hin ding dan ibol pia ukhu kipha mo ahi.

Thukhusitna

Khanglai te khu mission toh umkhom gige ihi na ah, amo umthei te kihilou dan aki chiang mama hi. Mission khu midangte (Others Faith) te kung a Pasian thu tangkou sese ahi sih a, ei ma mimal aum misson ahita a, tuami in ei leh ei ki bol phat, tuabanah aban ban na sep ding innsung ah, hattuum ah, khotang hinkhua ah, midang te panpi leh adang dang te khu mission ahi. Hibang teng semthei ding thahat lai khanglai te ihi zia un eite Pasian ginum bang in eite jong ginum tah a ama na sem ding in ki han chiam vai.

Gospel Tangkou April - May 2023

Chu Tuam Tuam:

- Apeisa nisim ni in MELC Mission Dept. Saina nuai a Church planter training Martin Luther Hall a nei in um a, tuanah Mission field apat workers teng leh Evangelists, Pro Pastors teleh tu leh tu a Bible graduate inei te uh tami hun a ki hel uhi.
- MELC Lamka Division Office leh Store room honna vaiguan Apeisa Nisimh 30th April 2023 ni in Immanuel Khopi ah Rev. Ngilzakhup DS Lamka Division in Honna nei hi.
- Ngulzeng Veng MELC in kum bangzat ahiai khat tha leh zung, sum leh pai, ngaitua na tampi toh ana bawl uh Pasion biehna ding hoi sem 26th April 2023 ni in Bishop MELC in Hon khiat na leh Pasion kunga latna nei hi.
- ELWA Hqtr saina toh 25th April 2023 Nehemiah Prayer Mount, Muolvaipei mun ah Thumkhawm na nei ua, tuanah I hattuum leh innsung ading in Pasion kunga thumna nei uhi. Thummi ding nu inei nalai man un Pasion iphat uhi.
- Apeisa 30th April 2023 Sunday ni in Alenung Ningthoujam Tentha Tawaband Mission field ah Rev. W. Manglem in gingtha Baptisma piehna ana nei hi.
- Tv. Haugoulal in apeisa 13th April 2023 ni in a sepna Dangapara Tripura mun ah asejna ana joined tahi. Tv. Haugoulal in Kangrai mun ah hani sung agam amual study kom in aum dinga, June 2023 apat in a station na ding mun Dangapara a Missionary na sem pan ta ding hi. Missionary loching ahing hithei na ding in hatuum miten thumpi vai.
- Apeisa 6th April 2023 apat sa in Women promoter in biel vehna nei a, Good Friday leh Easter Sunday sung teng Behiang Division a hun va zang hi. Maban May hasung Singngat Division sung Bial totna nei kia ding hi. Tualeh, Women Promoter in apei na teng ah ELWA Kumtawp Khompi chienga, kidemna ding Ruth

laibu sungteng kidemna ding banah tukum sunga numei teng teng in Bible bu 66 sunga numei min te abung achang toh gial tam penpen nuamman mu ding chileh anntangham, VDS, Jesu zintun chi te jong tang kou pi hi.

➤ MELC Mission Department panlahna jalin Lutheran Public School, Kangrai Tripura mun ah Class - IV room extension kibawl pen boljou ahi ta a, tualeh tu leh tu in jong kizang tahi.

➤ Singngat Division in tukum activity tuam tuam anei na uah, tukum Upa Tour nei ua tuanah, Evan. Goukhanpau group ten first phase jou ta uhi.

➤ Lutheran Public School, Kangrai Tripura a Missionary teacher khat lah ding a lemsahna bangin apeisa 1st April 2023 apat in Miss Jubilee Reang in 10th April 2023 apat in Teacher na sem in join ana bol tahi.

➤ Behiang Division in zong tukum sepsua dinga alem guat te lah ua, ELWA leh LYF ten tour division sunga nei ding a chi pen uh sem sua ta uhi. Tuabanah, Upa tour jong hun hing pei ding te ah nei nalai ding uhi.

➤ Mrs. Sayamti Reang in apeisa 1st April 2023 apat in Lutheran Public School ah chowkidar na sem in joined ana bol tahi.

➤ Singngat division LYF in tukum apeisa hun sung in zaan khovah thumkhomna nei ua, tuabanah sangnaupang te khual na in Pawl -X tung lam teng a ding in career guidance neipi ua, kumchin a ana bol zel uh Khanglai tour jong nei jou ta uhi.

Gospel Tangkou April - May 2023

THEISAHNA LEH NGETNA

MELC Upa Camp Committee Thupuasah No. 1 dt.10/04/2023 na in pha asah bang in ahing tung ding October 17th-22nd, 2023 sung Upa Camp nei ding a lem sah ahi dungzui in MELC huongsunga khochin, division leh local chin in tami hun sung a program ana guanggal lou ding in Pasian leh pawlpi min in kahing ngen hi.

Sd/-

Pro. Pastor Jamlianlal @ Johnlal
Secretary, Camp Committee

VBS

Koi zawng MELC huongsung a hattuum jousia tukum VBS bol ding ten VBS toh kisai laibu MELC office a muthei ding ahia, tuami toh kisai in Evan. Thangkhanpiang, Youth Promoter, Tv. Ginminlun M& Religion Secy leh Nh. Nuamboi, Women Promoter te kunga kanthei ding a muthei dinghi.

MELC Office a Laibu muthei te:

1. Beginner I-II *“Laisiangthou thu ki dawngtuo”*
2. Primary I *“Hinkhaw Thusim”* Part - I
3. Primary II *“Hinkhaw Thusim”* Part - II
4. Junior I *“Bible a etsahnate”* Part - I
5. Junior II *“Bible a etsahnate”* Part - II
6. Intermediate I *“Khristian kibulphuna”* Part - I
7. Intermediate II *“Khristian kibulphuna”* Part - II
8. Senior I & II *“Thugin bulpite zilsahna”*
9. *Khristian Labupi* (Tonic Solfa)
10. *Upa Khuttoi bu*
11. *MELC Kipuihuaina bu*

Patron Memberte

- | | | |
|--------------------------------|-------------------------------|---------------------------------|
| 1. (L) Upa T. Chinzakhai | 56. (L) Upa Pumzagin | 111. Pu T. Samuel Tualminthang |
| 2. Pi Warlita Manlun | 57. (L) Rev. Khaamthang | 112. Evan. T. Dongzalam |
| 3. Pu M. Khamzamang | 58. Pu T. Lamzagin ASC (Retd) | 113. Upa Paukhsuan |
| 4. (L) Upa T. Gougim | 59. Upa S. Kammang | 114. Pastor Ginsuanthang |
| 5. Upa M. Kaichinckham | 60. Pu L/Nk Mangchinthang | 115. Upa M. Khupkhanhau(Retd) |
| 6. P. Vungzathang | 61. Pu Pumkhanmang | 116. Pu M. Haukholian |
| 7. Pu P. Chinzakhpup | 62. Upa Tunzagin | 117. Pastor Chinlunmang |
| 8. Pi Chinnu (Mrs.Gouzadou) | 63. Pi Zengaihniang | 118. Pu H. Khaikhogin |
| 9. Upa D. Khupsuanpau | 64. Pu Chinsuanlam | 119. Pu T. Chinkhohau |
| 10. (L) Pu Thangkhanlal | 65. Nu Kangnu | 120. Pastor Khupdokhen |
| 11. Upa M. Jangkhoahau | 66. Pu Genkaphang | 121. Pu Khamkhanhau |
| 12. Upa T. Gouzalat | 67. Pu Paul Henkholal | 122. Pi Lunsuanchiin |
| 13. Upa Jangkhogin | 68. Upa Nengkhenthang | 123. Upa Tutzumang |
| 14. (L) Upa M. Khamzathong | 69. (L) Rev. P.K. Khama | 124. Pu Dongzakam |
| 15. (L) Pu H. Thangmang | 70. (L) Pi Nuamneikim | 125. Upa Thangchinhang |
| 16. Pu M. Ginzasuan | 71. Pu Dr. David Vumlallian | 126. Evan. Thangkhanpiang |
| 17. Pu M. Kailam | 72. Upa Ginzalam | 127. Pi Goikhanman |
| 18. (L) Pu T. Soiminthang | 73. Rev.Kamminthang Tungnung | 128. Upa Zamkhusuan |
| 19. Pu S. Suankhothong | 74. Rev. Thangliankham | 129. Pu Jamchinpau Samte |
| 20. Pu S. Tunsuanhang | 75. Rev. Nangkhanlal | 130. Sya Tunzalang |
| 21. (L) Pu Hauchinmang | 76. Sya Dongzapum | 131. Evan. D. Ginpu |
| 22. (L) Dr. Upa Tongkhokai | 77. Dr. N.D. Samte | 132. Pastor Khamkhenthang |
| 23. Pu T. Ginzamang | 78. Pu Sienzathang | 133. (L) Upa Chinsuanpau |
| 24. Pu T. Goupau | 79. Pu Sheshei | 134. Pu P. Tunzalam |
| 25. (L) Dr. Lampu | 80. Rev. Dr. S.K. Manlun | 135. Pastor Kamneithang |
| 26. Pu P. Sanjeev | 81. Pu Hauliankap | 136. Mother Nuamzavung |
| 27. Upa P. Kamzadou | 82. Pastornu Niangzadim | 137. (L) Upa Thongzalam |
| 28. Dr. Ginniing | 83. Rev. Ngilzakhup | 138. Pu Kaikhankap |
| 29. (L) Upa Lt. Col.Thongzadou | 84. Pu Hausuanthang | 139. Ex-Sub. Upa Kaichinpau |
| 30. Pu John Zamkhomang | 85. Upa Khamchinlam | 140. Pu Ex-Hav. Thangzakhpup |
| 31. (L) Pu M. Lunkhoneh | 86. (L) Khaiminlian (13 yrs) | 141. Upa S. Suanzakham |
| 32. Pu Kapzamang | 87. Upa H. Khamzamang | 142. P. Chinminthang |
| 33. (L) Pu Hauchinthang | 88. Pu P. Sienzadong | 143. Rev. Retd.S.Nengkhanmang |
| 34. (L) Upa S. Khamzalam | 89. Pi Neikhokim | 144. Pu T. Lianchinlam |
| 35. (L) Upa Sub. Lianchinmang | 90. Pu Hausuanlam | 145. David Kapsuanmung Zo |
| 36. Upa S. Zamzalam | 91. Pu Ginminthang (Gigin) | 146. Nu Vunghaunang |
| 37. Pu Khamzaton | 92. Pu Khupminthang | 147. Tv. Goumuanckhup |
| 38. Pi Nemrang | 93. Nu Lhainei | 148. Khupno Tombing |
| 39. Upa Tuahchinhou | 94. Rev. Kamminthang | 149. Ginshanglian Samte |
| 40. (L) Upa Kaikhohau | 95. Pi Ngailianmoi (Momoi) | 150. Ex.Hav. Khupzathang |
| 41. Dr. Jainson Haokip | 96. Pu Aron T. Muanthang | 151. Nu Muanchig Sangma |
| 42. Pu Kapkhanthang | 97. Pu Thongneipau | 152. Sub. P. Goukhanlian Zou |
| 43. Pi Manpi | 98. Pu Daikhanthang | 153. Ex-Hav. Sianzakhai Munluo |
| 44. Pu Philip Thanglienmang | 99. Upapu Soikhohau Samte | 154. (L) Upa Thangkhookam |
| 45. Upa Haukholam | 100. Rev.Retd. Thangkhanmang | 155. Upa Thangkhojam |
| 46. Upa Kaikhanlun | 101. Rev. Nengkhanlal | 156. Pastor Kapkhanhau |
| 47. Pi Lhingneiting (Helhing) | 102. Pastor Lamgen | 157. Pastor Thangkhangomang |
| 48. Pu Thangchinsuan | 103. Pi Cicilia Maman | 158. Upa M. Ginkhankhup |
| 49. Pi Goukhoniang | 104. (L) Pastor Kamzathang | 159. Upa T. Pumminlal |
| 50. (L) Pu T. Gouchinthang | 105. Upa T. Nungkhochinpau | 160. Pa M. Khammuanlian Zou |
| 51. Pu M.L. Thanghau Zou | 106. (L) Rev. Dousuanthang | 161. Nh. Momawi Milun |
| 52. Rev. Dr. V. Hangminthang | 107. Rev. Hangpi Manlun | 162. Upa M. Hauminthang |
| 53. Rev. Dr. Ginkhanmung Zou | 108. Tv. Hautchang | 163. Pastor Kamsuanli |
| 54. (L) Ex.Nk. T. Dongminthang | 109. Rev. Thangchinkhup | 164. Ex.Sub.Upa T. Mangkhenmung |
| 55. Pi Neingaimawi | 110. Pastor Kapsuanckhup | 165. Pu T. Ginkhothong |
| | | 166. Upa V. Lawmsang |
| | | 167. Pa Sawmkholal |
| | | 168. Pa Lianzagou Zou |
| | | 169. Nh. Nuamboi (W/Promoter) |
| | | 170. Pastor Douchinlal |

Koipou Patron member a pang utte a dingin ☐. 2000/- pie in a pang thei gige hi.

NGULZEN VENG BIAHINN HONNA



(RNI Regd. No:62170/95 MNP 76)
BOOK POST

To

.....
.....
.....

If undelivered, please return to
The Editor, Gospel Tangkou
MELC Office, Hqtr. Zomi Colony
Post Box – 10, Churachandpur - 795 128
Manipur, India,
e-mail : melchqtrs@gmail.com

*Layout & Typesetting @
MELC Office
Printed @
Thawmsons Color Press,
H. Lamka*

Gospel Tangkou (Gospel Herald)
RNI Regd. No : 62170/95 MNP 76
(Hachin a kisuo, hattuom khanletna ding)